

Neujahrsansprache 2026

Geschätzter Abt, liebe Funktionäre
Es is uns wieder eine große Ehre
Beim Neujahrempfang an euch Danke zu sagen
Für euern Einsatz, euer Plagen
Des ganze Jahr, was ihr da leists
Da Rückblick jeds Jahr beweists
Eidenberg als Gemeinde is anders als de Meisten
Völ kinnantn uns mir, ohne euch net leisten
So a miteinander in de Vereine zu erleben
Tuats weit und breit net geben!

Mei Rückblick selbstverständlich wieder ohne de KI
Weil sunst wars ja net I

2025 war des Jahr, der großen Reisen
Da Genger Chor derf se im Petersdom beweisen
A tolles Kirchenkonzert zum Jahresend
Begeistert klatschen alle in de Händ
De Eidenberger Musi war gar net fad
Hat am Mittelmeer ihre Runden draht
Brass Palmas is für de Gemeinschaft nett
Aber heuer reservieren dos ohne Bett
Weil unser Kirchentante so oft vereist
kummt a echter Kirchengeist
sorgt für Aufregung und war verwirrt
zum Glück is in Eidenberg nix passiert!

Unser Pfarr bemüht se sehr
Doch de Junga Kirchenbesucher wern nimmer mehr
Im Vatikan solln de Köpf ja längst schon rauchen
Wann ma immer mehr Seelsorger aus Afrika brauchen
De Pfarre macht mit Rodl Donau St. Anna an Neubeginn
Pfarrer Abt Reinhold muas dann überall hin
Zur Seite steht ihm aber in Zukunft Maria Krone
De Sorgen in da Kirche san net ohne!

D Feuerwehr Eidenberg is schon 100 Jahr
Am Freitag a netter Feierabend war
Aber a D Feuerwehr Kronabittedt
Des 100 Jahr Feiern guat versteht
da Bezirkshauptmann war gar net fad
in da Seiterlbar er seine Rundn draht

Groß feiert a de Feuerwehr Geng
Beim Abschnittsbewerb war da Durst net zweng
Ruck zuck hams a neiche Bruckn baut

Da hat da Wasser Hofrat gschaut
Da neiche Tankwagen kriagt sein Segen
Da Lichtmast tuat se trotzdem net bewegen

De Aufregung war mit da Busverbindung groß
Was is mitn Verkehrsverbund wohl los
baun um über 7 Millionen den Bahnhof um
und de Eidenberger schaun dann dumm
koa Verbindung zum Hauptbahnhof mehr
dös mit Eidenberg bleibt eahna gwiß a Lehr
da Burgermoaster mit Medien und Landesrat
Eidenberg mit Fahrplanwechsel wieder an Anschluss hat

Um fast 700.000€ baut de Gemeinde oan Kindergartenraum dazua
Doch nur 14 Geburten im letzten Jahr san da net gmua
Früher sagt da P. Laurenz zu de Mütter nu Brav Brav
Und de Taufen hörn net af
Jetzt brauch ma wahrscheinlich an längeren Stromausfall
Dann steigt wieder de Geburtenzahl

Damits heuer im Winter wieder besser geht
A neicher Unimog im Einsatz steht
Do a da Traktor kummt schon in de Jahr
de Reparaturen werdn nimmer gar

Was is des für Aufregung gwen
wann ma übern Handysender redn
Jetzt steht er beim Ertl oben im Wald
und lasst de Eidenberger völlig kalt

Sportlich war de Union Eidenberg wieder im Langlauf guat
Da Nachwuchs mehrere Staatsmoaster macha tuat
A mit de kloan Bälle is Eidenberg guat drauf
aber mit großen Bälle heart se s gwinnen auf
im Fuaßball kanns nur besser wern
schaun ma was ma im Frühjahr von unsere Kicker hern
De Nachwuchsarbeit in de Sektionen hervorragend is
Der Erfolg kummt wieder, des is gwiß

Net zum vergessen da Seniorenbund
Des ganze Jahr geht's rund
Des allweil trawi lern i a schon kenna
Pension tuat ma des dan nenna

S Lehner Eck war lang net schen
Jetzt tuat aber was weiter gehn
Am 19. April müassn de Zimmer fertig sein
Botaniker kinnan se auf a grünes Dachl gfrein

Da Kulturstadl is a tolle Gschicht
Weithin findest du das nicht
Wo könnnt d'Musi so schene Konzerte macha
Eidenberg über de Kabarettisten lacha
An Weihnachtsmarkt schnell organisieren
Beim Flohmarkt den Überblick net glei verlieren
Der Gwölbwahnsinn schon glei legendär
Beim Oktoberfest tringans fast nu mehr
beim Leonhardiritt de Leit untabringa
unvergessen des Loawändsinga
und dös alls ehrenamtlich verwalten
Danke an Alle de sovüll gestalten!

Im Jugendheim Geng de Bücherei
Bei da Besucher ganz vorn dabei
De Lesung der Lebensgeschichte hat viele berührt
Wann ma de Anwesenheit von der Betroffenen spürt

Wann i in de Nachbargemeinden schau
Kaum wo gibt's an Krippenbau
Eidenberg hat glei 2 davon
Fangt schon bei de Volksschüler erfolgreich an
In vül Häuser schon a Krippen steht
Hoff ma das lang nu weitergeht

San ma dankbar und froh was bei uns in Eidenberg alls nu gibt
Unsere Gasthäuser und s'neiche Cafe san recht beliebt
Am Samstag da Bioladen ghert a dazua
Und S Megs täglich ab 6.00 Uhr in da Fruah
Überall steckt sovüll Idealismus drin
I kann nur ersuachen geht's öfters hin
Vül größere Orte ham nix mehr von dem
bei uns is de Lebensqualität nu angenehm

Helf ma alle zam, dass es so bleibt
und 2026 die Erfolgsgeschichte weiterschreibt
und mein Bericht is somit gar
mit den besten Wünschen für des neiche Jahr!

Bgm. Adi Hinterhölzl